



Poslanikovi savjeti (Meka)

Hatib: dr. Abdullah ibn Avad el-Džuheni

20. ševval 1441. po Hidžri / 12. juni 2020.

Sva hvala i zahvala pripadaju Allahu. Njega hvalimo, od Njega pomoć i oprost tražimo i Njemu se utječemo od zla naših duša i naših loših djela. Koga Allah, džellešanuhu, uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osima Allaha, Jedinog, Koji druga nema, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.”

Najistinitiji govor je Allahova Knjiga, uzvišen neka je On. Uspio je i spasio se onaj koga je On uputio u islam, kome je ukazao Svoje blagodati i ukrasio njegovo srce Kur'anom časnim, koji je odlikovao nad svakim drugim govorom. On je najljepši i najsnažniji govor. Volite Allaha, džellešanuhu, svim srcem, volite Njegov govor i zikr i volite one koji vole Njegov govor i zikr. Nemojte se umoriti od Njegovog govora, učite ga noću i danju, i nemojte se udaljavati od njega, pa da vam srca otvrdnu.





O vjernici, obožavajte Allaha, džellešanuhu, i nikoga Mu ne smatrajte ravnim, bojte Ga se onako kako se treba bojati. Budite iskreni prema Allahu, džellešanuhu, u onome što govorite, i volite se u ime Njega. *Znajte, čija briga bude ahiret, Allah, džellešanuhu, dat će mu bogatstvo u srcu, učinit će ga smirenim i dunjaluk će mu dolaziti ponizno (makar ga on i ne želio), a čija briga bude dunjaluk, Allah, džellešanuhu, dat će mu siromaštvo pred očima, učinit će ga rastresenim i od dunjaluka mu neće doći osim onoliko koliko mu je propisano.*

Ova kuća je kuća povijanja, a ne kuća uzdizanja, i kuća žalosti, a ne kuća radosti. Ko je istinski spozna, neće se radovati zbog blagostanja, niti će tugovati zbog nedaće. Allah, džellešanuhu, stvorio je dunjaluk kao iskušenje, a iskušenje dunjaluka učinio je uzrokom nagrada na ahiretu, a ahiretsku nagradu učinio je naknadom za iskušenje dunjaluka. On uzima da bi dao, i iskušava da bi nagradio.

Dunjaluk brzo prolazi, prevrtljiv je i promjenjiv. Čuvajte se njegove varljive slasti, jer bi se ona vrlo brzo mogla pretvoriti u gorčinu. Pazite se trenutnog užitka, jer bi on vrlo brzo mogao postati neugodnost. Ne trudite se da izgradite kuću kojoj je Allah odredio propast, i ne vežite se za nju kada je Allah htio da se udaljite od nje, pa ćete se tako izložiti Njegovom gnjevu i zaslužiti Njegovu kaznu.

Ovo su Poslanikovi plemeniti savjeti i dragocjeni biseri, ko ih prihvati, prihvatio je vrijednu i veliku stvar. Uzvišeni kaže: "O vjernici, odazovite se Allahu i Poslaniku kad od vas zatraži da činite ono što će vam život osigurati; i neka znate da se Allah upliće između čovjeka i srca njegova, i da ćete se svi pred Njim sakupiti." (El-Enfal, 24)

Oporučujem sebi i vama da se bojimo Allaha, Koji ostaje, a sve mimo Njega prolazi, i Koji ukazuje počast onima koji Mu se pokoravaju, a u zabludi ostavlja one koji su Mu nepokorni. Zabludjeli nema opravdanja zbog svoje zablude koju je smatrao uputom, niti zbog ostavljanja istine koju je smatrao zabludom. Držite se bogobožnosti i ustrajte u njoj, ona će vam biti putokaz u svim stvarima i situacijama,





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

zbog nje će vam Allah, džellešānuhu, oprostiti grijehе i opskrbit će vas Svojim dobrima i blagoslovima. Držite se puta bogobožnosti, sve dok se ne sretnete s Njim, i molite Allaha da vas učvrsti u tome. Čuvajte se grijehа, jer su oni jedan od glavnih uzroka Njegove srdžbe, gnjeva i kazne. Allahu se utječemo od Njegove srdžbe i kazne!

Znajte, o ljudi, da je obaveza svakog muslimana da donosi salavate i selame na Vjerovjesnika, sallallahu alejhi ve sellem, u svakom vremenu i situaciji, a ne samo u kada su u potrebi, a zaboravljaju ga u blagostanju. “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalјite mu pozdrav!” (El-Ahzab, 56) Poslanik, sallallahu alejhi ve sellem, rekao je: “Ko na mene donese jedan salavat, Allah na njega donese deset salavata.”

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijehа, a tražite i vi, On mnogo prašta i milostiv je.

